

PARLIMEN MALAYSIA

PEMBERITAHU PERTANYAAN DEWAN RAKYAT

PERTANYAAN : Bertulis

DARIPADA : Puan Teresa Kok Suh Sim [Seputeh]

SOALAN : Puan Teresa Kok Suh Sim minta
MENTERI PERTANIAN DAN INDUSTRI
ASAS TANI menyatakan jumlah nilai
makanan berasaskan pertanian yang
diimport pada tahun 2013, 2014 dan
2015. Apakah perancangan Kerajaan
untuk menurunkan pengimportan
makanan dan menjamin warga Malaysia
mempunyai makanan yang cukup.

JAWAPAN

Tuan Yang Dipertua,

Jumlah nilai makanan berasaskan pertanian yang diimport pada 2013, 2014 dan 2015 adalah seperti mana berikut:

2013 (RM 'billion)	2014 (RM 'billion)	2015 (RM 'billion)
38.8	42.6	45.4

Komoditi yang menyumbang kepada nilai import yang tinggi pada tahun 2015 adalah:

- i. bahan makanan untuk ternakan (RM7.012 juta);
- ii. kopi, koko, teh dan rempah (RM6.464 juta);
- iii. bahan makanan lain seperti majerin dan lelemak, makanan bayi, sos dan lain-lain (RM5.232 juta); dan
- iv. bijirin dan sediaan bijirin (RM4.737 juta).

Bagi mengurangkan kebergantungan import, Kementerian akan melaksanakan strategi untuk membangunkan penggantian import dan industri yang menggunakan input barangan import yang rendah. Di bawah strategi ini Kementerian akan melaksanakan beberapa tindakan seperti berikut:

- a. Meningkatkan pengeluaran makanan melalui:
 - i) penumpuan Penyelidikan dan Pembangunan (R&D) kepada peningkatan pengeluaran hasil secara

mampan. Antara bidang tumpuan R&D meliputi pembangunan varieti dan baka, pengeluaran benih, pengeluaran makanan ternakan, bioteknologi, mekanisasi dan automasi, sistem pengeluaran di bawah *modified environment*, kaji penyakit, piawaian dan gred serta pemuliharaan sumber dan teknologi hijau;

- ii) pelaksanaan Projek Berimpak Besar seperti Taman Kekal Pengeluaran Makanan (TKPM), Zon Industri Akuakultur (ZIA), Ladang Kontrak dan Pembangunan Usahawan Asas Tani serta *Entry Point Projects* (EPP) di bawah NKEA Pertanian; dan
 - iii) penggunaan tanah pertanian secara optimum di mana kawasan tanaman semula kelapa sawit akan dibangunkan dengan menjalankan projek integrasi ternakan di kawasan perladangan industri.
- b. melaksanakan pelan penggantian import melalui:
- i) Menghasilkan tanaman alternatif tempatan di mana pelaburan dan dasar akan digerakkan bagi meningkatkan pengeluaran produk domestik untuk menghasilkan produk tersebut. Kementerian melalui MARDI akan meningkatkan skala sistem pengeluaran jagung bijirin (*grain corn*) di Serdang pada 2016.

Sebanyak 20 hektar jagung bijirin akan ditanam bagi tujuan makanan ternakan. Ladang jagung bijirin berskala besar dicadangkan untuk ditanam di Sabah pada 2017;

- ii) pembangunan tanah terbiar yang ketika ini dianggarkan berjumlah 120,000 hektar dibangunkan untuk aktiviti pertanian gantian import;
- iii) Kerajaan akan mempertimbangkan kebarangkalian untuk mewujudkan kontrak jangka masa panjang bagi input pertanian yang diimport (i.e.: baja dan racun perosak) untuk menjamin bekalan dan menstabilkan harga. Inisiatif juga akan diambil untuk melaksanakan perolehan berpusat bagi input pertanian untuk mengurangkan kos input tersebut; dan
- iv) Membangun dan menyokong industri *niche* yang menggunakan kandungan import yang minimal seperti sayuran organik yang menggunakan baja organik. Dalam hubungan ini, insentif akan diberikan bagi menggalakkan pengeluaran baja organik domestik.

c. lain-lain tindakan seperti:

- i) Melaksanakan pemutuan sebenar padi bagi meningkatkan produktiviti dan kualiti padi dan beras yang dihasilkan; dan
- ii) Penggunaan teknologi dan mekanisasi bagi mengurangkan kehilangan lepas tuai produk-produk pertanian seperti padi, buah-buahan dan sayur-sayuran. Langkah ini didapati mampu mengurangkan kehilangan lepas tuai daripada lebih 30% kepada kurang daripada 15% hasil ladang.

Kementerian mengambil maklum bahawa sesetengah produk tidak akan dapat digantikan. Oleh yang demikian, import akan tetap diteruskan. Namun demikian, kebergantungan import daripada negara tradisional dan sumber yang mahal akan dikurangkan. Kementerian juga akan mempelbagaikan sumber import daripada negara-negara baru yang boleh membekalkan barang tersebut dengan harga yang lebih murah.